

նում առաջ գնալ: Մըհէն կատաղութեան չափ բարկացած էր. «թո՛ղ ես անպիտանին, – ասում էր նա, – ես չեմ իմանում ի՞նչ բանի պէտք է: Մըհէի հետ վիճել այն քարերի մէջ, յիմարութիւն կը լինէր, պէտք էր նրա գլուխը մի կերպով շոյել: «Դա Կարոյի ձին է, ասում էի ես, նա է ընծայել ինձ, դու խօս Կարոյին սիրո՞ւմ ես»:

Մըհէն Կարոյի վրայ մեծ համարում ուներ, նրա անունը տալու ժամանակ նա մեղմանում էր. այստամենայնիւ ձին մեզ հետ քարշ տալը վերջապէս բոլորովին անհնարին եղաւ: Մըհէն յայտնեց, եթէ ես հաճութիւն կը տայի, նա կարող էր մի մարդ գտնել եւ ձին նրան յանձնել, որ յետոյ ուրիշ ճանապարհով բերեր եւ հասցներ մեզ: Եւ ակելացրուց, թէ ինքը շտապում է, շատ է շտապում, ձիան դանդաղ ընթացքով գնալ չէ կարող, որովհետեւ Ասլանի վրայ նամակ ունի, պէտք է շուտով հասցնի, եւ դրա համար ընտրեց դժոարին, բայց կարճ ու կտրուկ ճանապարհը:

Ես տեսայ, որ Մըհէի առաջարկութիւնն ուներ իր առանձին կարեւորութիւնը, բայց որտեղի՞ց մարդ գտնել եւ ո՞ւմ յանձնել ձին: – «Ես կգտնեմ», ասաց նա եւ պատոհրեց ինձ մի փոքր սպասել ձիան մօտ, իսկ ինքը առաջ վազեց եւ մի թուփով բարձրացաւ սարի գլխին, սկսեց այնտեղից նայել իր շուրջը: Նա արծոի սրատեսութիւն ուներ. շատ հեռոից տեսաւ մի հովիւ, որ արածացնում էր ոչխարներ: Այնուհետեւ նա իր մատները փողի ձեւով գալարելով դրեց բերնին, եւ այնպիսի մի որոտալից ձայն արձակեց, որի արձագանքը կրկնուեցաւ լեռների հեռակայքում: Քանի թուփից յետոյ նոյն ձայնով պատասխանեցին: Ես առաջին անգամ տեսայ, թէ լեռների մէջ ինչպէս են հեռոից-հեռու խօսում:

Շատ չանցաւ, մեզ մօտ յայտնուեցաւ հովիւը. դա մի քուրդ էր: Մըհէն մի բանի խօսք ասաց նրան քողերէն, յետոյ ձին յանձնեց:

– Զիմա մենք գնանք, – ասաց ինձ:

– Ու՛ր գնանք, դու ձին տալիս ես աւագակին եւ կարծում ես, թէ նա կդարձնե՞ մեզ:

Մըհէն իր առանձին եղանակով հանգստացրուց ինձ, ասելով, թէ եւ ինքը գիտէ, որ նա աւագակ է, բայց մի բան, որ յանձնում ես աւագակին որպէս աւանդ, նա սրբութեան պէս պահում է եւ կրկին դարձնում է իր տիրոջը: Բացի դրանից, ակելացրուց նա, թէ ինքը տեղեկացաւ, որ այդ հովիւը ո՛ր քողի հօտերն է արածացնում, եթէ նա անհաւատարիմ կը գտնուի իր պարտաւորութեան մէջ, ինքը Մըհէն կարող է մի ձիու փոխարէն յափշտակել նրա աղայի ամբողջ երամակը: